

**Parlimen: Malaysia Negara Keempat Tertinggi Berbelanja Untuk Pendidikan
Bernama
10 November, 2011**

KUALA LUMPUR, 10 Nov (Bernama) -- Malaysia berada pada kedudukan keempat tertinggi dalam peratusan purata perbelanjaan peruntukan bagi sektor pendidikan berbanding 57 negara yang berdaya saing dalam ekonomi.

Timbalan Menteri Pelajaran Datuk Dr Wee Ka Siong berkata kedudukan itu adalah berdasarkan kepada laporan 'World Competitiveness Yearbook' (WCY) 2010 yang dikelola oleh Institut Pengurusan Pembangunan.

Daripada negara-negara Asean, Thailand berada di kedudukan ke-32, Singapura ke-53, Filipina ke-56 dan Indonesia ke-57.

"Perbandingan ini membuktikan kerajaan sentiasa berusaha untuk melahirkan modal insan yang mampu memenuhi keperluan dan kemahiran bukan sahaja di peringkat tempatan malah ke antarabangsa selaras dengan usaha transformasi ekonomi ke arah mencapai Wawasan 2020 serta pelaburan dalam meningkatkan produktiviti negara," katanya menjawab soalan Datuk Rashid Din (PKR-Merbok) pada persidangan Dewan Rakyat di sini Khamis.

Rashid bertanya mengenai hitung panjang perbelanjaan kerajaan bagi satu murid untuk setahun bagi pendidikan di institusi pengajian tinggi awam dan swasta, kolej matrikulasi serta sekolah menengah dan rendah sepanjang tiga tahun lepas serta perbandingan perbelanjaan itu dengan negara-negara Asean.

Wee berkata hitung panjang perbelanjaan bagi seorang murid untuk tiga tahun kebelakangan ini ialah RM3,354 untuk sekolah rendah dan RM4,039 bagi sekolah menengah.

Malah, katanya, kerajaan menyediakan 22 lagi bantuan persekolahan berjumlah RM3 bilion setahun kepada murid berdasarkan kriteria tertentu.

Kerajaan juga membiayai sepenuhnya program matrikulasi dengan peruntukan purata setiap tahun sebanyak RM9,100 bagi setiap pelajar meliputi yuran pengajian, bayaran peperiksaan, yuran penginapan, elaun wang saku dan aktiviti kokurikulum, kata Wee.

Katanya Kementerian Pelajaran akan memperluaskan kadar kemasukan murid untuk pra-sekolah sehingga 87 peratus tahun hadapan dengan kerjasama pihak swasta.

"Sebelum adanya Bidang Keberhasilan Utama Negara, kita hanya mencapai 67 peratus dan kini kita telah menjangkau 80 peratus, di mana ia menunjukkan suatu peningkatan mendadak," katanya.

Wee berkata 100 buah sekolah berprestasi tinggi akan dibina tahun hadapan.

Source: <http://www.bernama.com/bernama/v5/bm/newsindex.php?id=625865>